



mjesečni Bilten

omladinska mreža bosne i hercegovine

novembar
studeni
2016.

210

Dragi prijatelji/ce,

Predstavljamo vam novembarsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **182** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net




SADRŽAJ

Aktivnosti u novembru 2016.	2
Planovi za decembar 2016.	6
Aktivnosti članova mreže.....	7
Saopštenja/informacije/donatori/pozivi.....	21


Uživajte u čitanju!

AKTIVNOSTI ORC/HCA U NOVEMBRU 2016.

Prekogranična građanska mreža za mir, pomirenje i sigurnost ljudi na Balkanu



(FPA) Završna manifestacija Skoplje



U Skoplju je, u periodu od 9. do 12. novembra održana završna manifestacija u okviru programa sporazumnog partnerstva. Glavni cilj ovog projekta je jačanje organizacija civilnog društva u zemljama zapadnog Balkana i Turskoj. Glavni organizator završne manifestacije bio je TACSO, a pokrovitelj Evropska Unija.

Cilj završne manifestacije bio je razgovor o generalnom razvoju civilnih društava u zapadnom Balkanu i Turskoj, kao i razgovori o mogućim preporukama za dalji razvoj organizacija i mreža civilnog društva. Tokom sastanka učesnici su razgovarali o svom doprinosu specifičnim temama na zapadnom Balkanu i Turskoj, te identifikovali moguće potrebe u tematskim mrežama: okoliš, prirodni resursi, energija i ruralni razvoj, borba protiv korupcije, javne nabavke i sloboda medija, društveni razvoj, ljudska prava, pomirenje i inkluzija. Na ovoj konferenciji su učestvovali predstavnici svih FPA projekata, predstavnici vladinih i javnih institucija, kao i predstavnici Evropske Unije.



Ovaj sastanak su predstavnici organizacija – partnera u mreži: „**Prekogranična građanska mreža za mir, pomirenje i sigurnost ljudi na Balkanu**“ iskoristili i za radni sastanak partnera, na kome su dogovorene završne aktivnosti u projektu, te nastavak zajedničke saradnje. Isto tako, 12. novembra je u Stone bridge hotelu u Skoplju održana i Javna debata na temu ljudske sigurnosti.

Projekat „Prekogranična građanska mreža za mir, pomirenje i sigurnost ljudi na Balkanu“ implementira Helsinški parlament građana Turska, zajedno sa partnerima: ADP ZID Crna Gora, SeConS Srbija, Institut za regionalne i internacionalne studije Bugarska, Centar za istraživanje, dokumentaciju i publikovanje Kosovo, Omladinski resursni centar Tuzla. Projekat je podržan od Evropske Unije.

Održana Konferencija o ljudskoj sigurnosti u Beogradu



U Beogradu je, 4. i 5. novembra održana treća međunarodna akademska konferencija o ljudskoj sigurnosti. Konferencija je održana u organizaciji: Centra za istraživanje ljudske sigurnosti Fakulteta bezbednosti univerziteta u Beogradu i Prekogranične građanske mreže za mir, pomirenje i sigurnost ljudi na Balkanu“, a podržana je od strane Evropske komisije.

III Međunarodna akademska konferencija o ljudskoj sigurnosti imala je za cilj okupiti vodeće akademike i istraživače, koji su podijelili svoja iskustva i rezultate istraživanja o svim aspektima međunarodne migracije i sigurnosti ljudi, kao i globalne i lokalne zdravstvene izazove, prirodne i druge nesreće, urbanog nasilja u javnim prostorima i održivog ljudskog razvoja.

Na Konferenciji su iz BiH učestvovali Jasmin Jašarević, PRONI Brčko i Miralem Tursinović – ORC Tuzla. Jasmin Jašarević je na konferenciji prezentovao istraživanje o Aspektu ljudske sigurnosti mladih koji žive u „kolektivnim centrima“ ili „alternativnim smještajima“ u BiH, koje je ORC i PRONI proveo u proteklom periodu.



„Ekipa iz komšiluka – poruka iz provincije“

Počeli smo sa implementacijom projekta: „Ekipa iz komšiluka – poruka iz provincije“. Projekat se realizuje u Srbiji, Bosni i Hercegovini i Crnoj Gori, u partnerstvu organizacija: FORCA Požega (Srbija), Omladinski Resursni centar Tuzla (BiH) i Fenomeni (Kolašin). Projektne aktivnosti će se realizovati u sljedećim opštinama i gradovima: Požega, Prijepolje, Užice, Priboj, Kolašin, Mojkovac, Bijelo Polje, Berane, Brčko Distrikt BiH, Bijeljina, Zvornik, Živinice i Tuzla.

Ciljevi ovog projekta su:

- Unapređenje kulturnog života u malim sredinama;
- Podrška razvoju kreativnog potencijala u manjim mjestima;
- Decentralizacija produkcije i pristupačnosti kvalitetnih kulturnih sadržaja građanima u manjim sredinama;
- Podrška i promocija kulturnih aktivnosti atipičnim za konzervativne sredine u kojima se projekat realizuje .

Planirane aktivnosti su:

- Sastanci sa lokalnim samoupravama i ustanovama kulture
- Sastanci sa kreativim sektorom u malim sredinama (organizacije i pojedinci aktivni u oblasti kulture i umetnosti)

- Popis kulturnih i umjetničkih događaja u navedenim opštinama
- Podrška aktivnostima mladih umjetnika u region

Koordinator u projektu ispred ORC Tuzla je **Ivana Jokić**.

U narednom periodu planiramo mapiranje kapaciteta u: Tuzli, Živinicama, Bijeljini, Brčkom i Zvorniku, te razgovore sa predstavnicima vlasti i kulturnih institucija.

Projekat je podržala Evropska kulturna fondacija.

Omladinska grupa ORC Tuzla

Peticija – potpiši za život



U srijedu, 9. novembra učenici JU Osnovne škole "Jala" posjetili su prostorije Omladinskog resursnog centra Tuzla i razgovarali sa članovima grupe Meritom Sokoli i Adijem Selmanom. Učenici ove škole su putem medija pratili nedavno realizovanu akciju Omladinske grupe Omladinskog resursnog centra Tuzla pod nazivom "Peticija - Potpiši za život", koja se bavila problemom sigurnosti pješaka u saobraćaju. Svjesni činjenice da i oni kao učenici koji svakodnevno prelaze cestu imaju sličan problem, obratili su nam se sa molbom da im članovi omladinske grupe pomognu oko realizacije njihove ideje. Naime, oni imaju za cilj da upute Gradskom vijeću Tuzle

inicijativu za postavljanje tzv "ležećeg policajca" na putnu komunikaciju koja prolazi pored njihove škole, a od članova grupe tražili su način na koji mogu najefikasnije ovu molbu uputiti prema nadležnim institucijama vlasti. Sastanak je prošao u odličnoj atmosferi, uz nadu da će akcija učenika Osnovne škole "Jala" dobiti konačan rezultat.

Nacionalni dijalog

U petak, 18. novembra članovi Omladinske grupe Omladinskog resursnog centra Adi Selman i Ivana Jokić prisustvovali su sastanku u Zenici, koji je organizovao Forum građana iz Zenice. Ovaj sastanak predstavlja aktivnosti nakon konferencije "Nacionalni dijalog", koja je u oktobru održana u Sarajevu. Sastanak je imao za cilj da predstavnici organizacija iz Bosne i Hercegovine, koji su već učestvovali na sarajevskom "Nacionalnom dijalogu", u Zenici definiraju daljnje korake i mogućnosti, kao i da stave akcenat na projekte koji bi mogli zajedničkim snagama biti dogovoreni u budućnosti. Sastanak je protekao u konstruktivnom razgovoru sa dogovorenim konkretnim rezultatima koji se ogledaju u daljnjoj saradnji na projektu "Nacionalni dijalog".



„Teško je, ali idemo korak po korak“

U srijedu, 23. novembra 2016. godine, u Mostaru je u prostorijama Intera parka održana konferencija pod nazivom „Business leadership conference“, u sklopu projekta „Teško je, ali idemo korak po korak“, podržanog od strane Ureda specijalnog predstavnika Evropske Unije u Bosni i Hercegovini, Matt Fielda.

Na konferenciji u Tuzli učestvovali su Marija Jokić i Mirnes Čerimović, a na konferenciji u Mostaru Mirnes Čerimović. Konferencija je bila jednodnevnog karaktera, a prije Mostara održana je u Tuzli, te je najavljena konferencija u Bihaću, Bijeljini, Banja Luci i Sarajevu.



Ovakvo okupljanje ima za cilj upoznavanje određene privredne regije sa njenim potencijalom i trenutnim stanjem. Učešće na konferenciji uzele su brojne firme iz regiona, od kojih su učenici mogli dobiti vrijedne informacije, između ostalog na konferenciji su bili predstavnici iz REDAH agencije, N:Soft, N Home, Violeta, Ministarstva privrede HNK, te mnoge start-up kompanije.

Social Impact Making

U Pančevu u Srbiji, održao se training course „Social Impact Making“, cilj ovog TC bio je da se nauče know-how i up-to-date alati i tehnike rada sa ciljem stvaranja društvene promjene kroz inovativne medije, informacije i komunikacijske strategije. TC trajao je od 18.11. do 25.11.2016. godine. U realizaciji TC učestvovalo je ukupno 17 mladih iz 8 evropskih zemalja, i to: Srbije, Poljske, Bosne i Hercegovine, Češke republike, Portugala, Velike Britanije, Rumunije i Španije. OGORC je u Pančevu predstavljao Suad Murselović. Ovo je bio drugi po redu Training Course, od ukupno 4 koliko je planirano da se realizira, a osnovna ideja i cilj projekta je da se kroz praktične radionice o podacima i informacijama u komunikaciji nauči „pričanje priče“ u kontekstu društvenih kampanja.



Osim navedenih aktivnosti Omladinska grupa ORC je dobila sredstva za implementaciju dva projekta koja su osmislili i napisali članovi grupe:

„Graffiti- umjetnost ili huliganstvo“ koji je podržala Omladinska Banka FTZ, koji za cilj ima edukaciju mladih, uređenje javnih površina, zaštitu kulturnih i historijskih spomenika i arhitektonskih dobara. Projekat će se implementirati u martu 2017.godine u Tuzli. Tim odgovoran za implementaciju projekta čine: Amila Redžić, Edin Mukić i Samira Halković

„Budi cool i postavi standard“, koji je podržan od strane Instituta za razvoj mladih KULT. Ovaj projekat ima za cilj povećanje svijesti kod mladih o posljedicama uzimanja psihoaktivnih supstanci, povećanje nivoa svijesti o ovom problemu, struktuiranje slobodnoga vremena mladih, promoviranje zdravog načina života i te kako se nositi sa stresnim situacijama u porodici, školi i sa vršnjacima. Implementaciju projekta u Tuzli i Brčkom će voditi Husein Šljivić i Merita Sokoli do kraja 2016.godine

Redovne aktivnosti ORC i hCa Tuzla:

Tokom novembra radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Obezbijedili smo i učešće naših volontera za potrebe aktivnosti drugih organizacija (Transparency international, KULT Sarajevo, PRONI Brčko, itd.) Isto tako, naš projektni tim nastavio je sa apliciranjima za projekte za ovu godinu.

PLANOVI HCA/ORC-A ZA DECEMBAR 2016.

- Sprovođenje redovnih aktivnosti kroz Omladinsku mrežu BiH;
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Promocija i distribucija nove hronike u okviru projekta ljudske sigurnosti sa temom „Izbori kao stalna prijetnja sigurnosti građana BiH“
- Nastavak aktivnosti na partnerskom projektu „Crew from the hood – Messages from province“, sa partnerima iz Srbije (Forum građanske akcije – FORCA Požega) i Crne Gore (NGO Fenomeni Kolašin).
- Organizovanje novogodišnje zabave za volontere i članove Omladinske Grupe ORC Tuzla.



AKTIVNOSTI ČLANICA OMLADINSKE MREŽE BiH



Omladinsko udruženje Nova vizija

Ul. Opara bb, 72290 Novi Travnik

Tel./fax: +387 61 309 687, +387 61 593 773

E-mail: ounovavizija@gmail.com

Facebook: <https://www.facebook.com/ounovavizija>

Članovi Nove vizije koji djeluju u okviru sekcije “Volonterska eko patrola”, na lokalitetu izletišta Pavlovica i jezera Radovan postavili su klupe za odmor i završili markaciju planinarsko-biciklističkih staza. Volonteri su postavili dvije klupe na posebno odabranim mjestima na izletištu Pavlovica, dvije na šetačkoj stazi Pavlovica-Tunel-Nekropola stećaka Maculje i dvije na lokalitetu jezera Radovan. U sklopu ove aktivnosti isti dan završena je i markacija planinarsko-biciklističke staze prema nekropoli stećaka, ukupne dužine 2,4 km, i staze prema jezeru Radovan 4,0 km. Ovim je znatno unaprijeđena sigurnost i poboljšan ambijent boravka u prirodi, s obzirom da je od nedavno nekropola stećaka Maculje na UNESCO-voj listi zaštićenih spomenika, a jezero Radovan postaje sve više privlačno ribolovcima i planinarima.



Sve aktivnosti realizovane su u sklopu projekta Lokalne građanske inicijative, koji finansira Institut za razvoj mladih KULT, a provodi Omladinsko udruženje Nova vizija.

Ostaje nada da će ovakve inicijative dobijati sve veću podršku a da će postavljeni inventar biti sačuvan i dostupan izletnicima. Aktivnosti na ovom projektu podržala je i općina Novi Travnik.



U danima kad se obilježava Dan državnosti možda je ovo najbolji poklon koji mladi mogu dati svom gradu, prave akcije za zajednicu.

Više fotografija dostupno na:

<https://www.facebook.com/media/set/?set=a.1347658311925706.1073741895.709805612377649&type=3>

Mladi u Novom Travniku izabrali dijalog kao put izgradnje bolje budućnosti

U prostorijama Omladinskog centra Novi Travnik, u četvrtak, 17.11. održan je sastanak vijeća učenika srednjih škola u Novom Travniku, članova lokalnog tima asocijacije srednjoškolaca i predstavnika općine Novi Travnik. Sastanak se realizirao kao dio aktivnosti u sklopu projekta Lokalne građanske inicijative, koji je podržan od strane instituta za razvoj mladih KULT, a implementira se u Novom Travniku. Ovo je bila jedinstvena prilika, jer su se po prvi put vijeća učenika koja rade po bosanskom i hrvatskom programu, sastala i razmijenila informacije. Mladi u ovom gradu, a posebno učenici, nemaju prilike i dovoljno snage da se izbore sa nametnutim predrasudama o podjelama u nekad zvanom gradu mladosti. Upravo je kroz ovaj sastanak otvoreno razgovarano o problemima mladih te predložene mjere kako povećati dijalog i pospješiti saradnju među mladima, a samo zajedno mladi mogu da postignu mnogo više.



Nova vizija inicirat će zajedničke sastanke i druge aktivnosti, a sve s ciljem kreiranja zdravih ideja i rješavanjem konkretnih problema za mlade u ovom gradu jer mladi zaslužuju bolju i sretniju budućnost daleko od vjela nacionalnih podjela.



VIJEĆE MLADIH FEDERACIJE BOSNE I HERCEGOVINE

4. viteške brigade 34-36, Ilidza Tel./Fax: +387 33 778-770

E-mail: vmfbih@gmail.com

Web: www.vijecemladih.ba



U novembru 2016. Godine, Upravni odbor Vijeća mladih FBiH je imao sastanak u Orašju, gdje je donesena odluka o najboljem logu. Od svih prijave koje su pristigle u okviru Konkursa za izradu loga za Vijeće mladih FBiH, najbolji prijedlog je imao Darko Kipet. Nakon proglašenja i kontaktiranja pobjednika, počele su pripreme za izradu web stranice, promotivnog materijala i svih vizuala koji su bili navedeni u samom Konkursu za izradu loga.

Sastanak Upravnog odbora u Orašju je bila odlična prilika da se susretnemo sa mladima iz te zajednice i sa njima razgovaramo o omladinskom aktivizmu i općenito o uslovima za njih. Također

smo imali sastanke sa načelnicima Općina u Posavskoj županiji, gdje smo htjeli da pružimo podršku mladima u tom kantonu/županiji u lobiranju za poboljšanje položaja mladih.

Vijeće mladih Federacije Bosne i Hercegovine je pokrenulo inicijativu "AKTIVNI I DANAS!" kojom želimo u decembru da promoviramo omladinski aktivizam. Zamišljeno je da se što više omladinskih organizacija motiviše da svaki dan u jednom gradu/zajednici imamo neku aktivnost koja promovirao omladinski aktivizam. U narednom mjesecu imamo namjeru da promoviramo sve te aktivnosti uz oznaku **#mladismo**



Posljednji mjesec u godini će obilježiti naša prva izvještajna Skupština koja je planirana da se održi u Mostaru. Prije same Skupštine, članovi Vijeća mladih će imati jedan trening u Sarajevu a sa ciljem jačanja kapaciteta same organizacije.



Anesa Hidić, član Omladinske mreže, pojedinac

Omladinski krug Kladanj

E-mail: anesahidic@hotmail.com

Dodijeljena priznanja učenicima za zapažene rezultate

Na svečanosti u Bosanskom kulturnom centru (BKC) u Tuzli dodijeljena su priznanja za 275 učenika koji su na kantonalnim, federalnim, državnim i međunarodnim takmičenjima ostvarili zapažene rezultate. Upućujemo iskrene čestitke svim nagrađenim na priznanjima, a posebno našoj učenici Avdibegović Lamiji iz Kladnja koja je sa velikim uspjehom i rezultatima predstavila naš Kladanj.



Promocija proizvodnje, korištenja i kupovine domaćih proizvoda



Slogan je učenika VII i VIII razreda područne škole u Stariču, koji su 16.novembra zajedno sa roditeljima i razrednicom Salihović Jasminom završili višednevne aktivnosti u promociji proizvodnje, korištenja i kupovine domaćih proizvoda. Posebnu pažnju poklonili su domaćim proizvedenim, zdravim namirnicama, ali i koristi koju imamo svi povjerenjem i kupovinom domaćih proizvoda. Posebnu pažnju poklanjamo vrijednosti koju su prezentovali učenici znanjem o kvaliteti domaćih proizvoda, namirnica. PROIZVODIMO I KUPUJMO DOMAĆE, ISPLATI SE!

Akcija „No hate“ lokalnog tima Kladanj

Još jedna akcija našeg No hate tima, povodom Dana tolerancije 16.11.2106. podijelili smo simbolične paketiće sa školskim priborom djeci pripadnicima nacionalnih manjina. U akciji su učestvovali Avdibegović Ernada, Mašić Amina, Mašić Namir i Hidić Anesa.



Natječaj za najbolju fotografiju Kladnja

Pobjednici natječaja za najbolju fotografiju Kladnja su učenici Mješovite srednje škole „Musa Ćazim Ćatić“ Kladanj : Rašidović Kenan i Hidić Anesa.



Autor: Kenan Rašidović



Autor: Anesa Hidić

Talenat Kladnja

Meris Mazalović (18) iz Kladnja oduševljava košarkašku javnost u BiH, kao i trenere koji su radili sa njim. Kao dječak je počeo trenirati košarku još dok je bio treći razred (2007), da bi se godinu dana nakon toga teško razbolio, te propustio parket na više od godinu dana. Na teren se vratio 2009. godine i kako kaže, bilo mu je teško nadoknaditi propust, ali je opet važio za velikog talenta i bio među najboljim u svojoj generaciji.

Još kao dječak bio je jedan od najboljih u svojoj generaciji, uvijek se izdvajao od drugih, postizao nevjerovatne individualne rezultate, na mečevima je znao postizati i preko 50 poena.

Nakon zapaženih rezultata u Bosni i Hercegovini, Meris Mazalović je otišao u inostranstvo, te sada nastupa za Bournville College i bilježi zaista zapažene rezultate.

U prošlom kolu tamošnjeg prvenstva Meris Mazalović imenovan je za EABL košarkaša nedjelje u šestom kolu sezone 2016/17. Mazalović je u pobjedi njegove ekipe 72-71 postigao presudni pogodak protiv do tada neporaženog Myerscough Collegea, završio je susret sa 21 ubačenim poenom, 13 skokova i 3 blokade.





Institut za razvoj mladih KULT

Ul. 4. viteške brigade 34-36 BA, 71210 Ilidža, Sarajevo

E-mail: kult@mladi.org

Tel.: +387 33 778 778; Fax: +387 33 778 779

Web: www.mladi.org

ZDK treba strategiju prema mladima

Predstavnici Instituta za razvoj mladih KULT, početkom novembra prisustvovali su sastanku sa predstavnicima Ministarstva za obrazovanje, nauku, kulturu i sport Zeničko-dobojskog kantona, a tema je i ovog puta bila izrada Strategije prema mladima.

Zeničko-dobojski kanton prvu Strategiju o razvoju mladih imao je za period 2009. – 2014. godina, a u planu je i izrada Strategije za naredni period.

„Kanton već izdvaja novac za mlade, ali je dobro da imamo Strategiju djelovanja prema ovoj populaciji čime bi i sredstva trebala biti bolje usmjerena, a problemi brže detektovani i riješeni“ – istakao je ministar Mensur Sinanović.

Na sastanku se razgovaralo i o izradi Analize o problemima i potrebama mladih u ovom kantonu, te rezultatima koji su postignuti implementacijom ranije Strategije prema mladima.

"Institut dugo saraduje sa općinama u ZDK, podržava akcije mladih i moram istaći da je njihov angažman vrlo pohvalan. Mladi učestvuju u društveno korisnim akcijama, a značajno su uključeni i u procese neformalnog obrazovanja.“ – poručio je Jasmin Bešić, izvršni direktor Instituta za razvoj mladih KULT.

Na sastanku se govorilo i o aktuelnom stanju mladih u Bosni i Hercegovini, pitanjima mladih u ZDK, te potencijalnoj saradnji.



O položaju mladih BiH i na Transatlanskom forumu u Washingtonu

Predstavnica Instituta za razvoj mladih KULT Ajka Baručić, prisustvovat će Transatlantskom ekonomskom forumu koji će 5. i 6. decembra biti održan u Washingtonu, a na kojem učestvuju predstavnici trinaest zemalja mediteranske regije.

Riječ je o prvom značajnijem međunarodnom multilateralnom događaju u Washingtonu, nakon izbora u SAD-u. Forumu prisustvuju brojni ugledni poslovnih ljudi iz SAD-a i regije, a među kojima i ovogodišnji dobitnici nagrade SAIS-a: Husni Bey, jedan od najbogatijih poslovnih ljudi iz Libije, Ali Haddad, predsjednik foruma poduzetnika Alžira, te ETHRB firme, koja vodi skoro sve infrastrukturne projekte u Alžiru, Dušan Knežević, vlasnik Atlas grupe i predsjednik mediteranskog univerziteta iz Crne Gore

Neki od učesnika iz Bosne i Hercegovine su Mirko Šarović, ministar vanjske trgovine i ekonomskih odnosa BiH, Željka Cvijanović, premijerka Republike Srpske, Goran Mirašić, savjetnik premijera FBiH, Mladen Filipović, predstavnik ureda RS-a u Beču i drugi.

Učesnica panela o provođenju reformskih procesa u Bosni i Hercegovini bit će i Ajka Baručić, ekonomska stručnjakinja u Institutu za razvoj mladih KULT.

Značaj Foruma za Bosnu i Hercegovinu ogleda se i u premijernom prikazivanju promotivnog filma historijskog turizma u BiH koji je pripremila Američko-bosanska fondacija kao važan doprinos promociji razvoja turizma u BiH.

Okupljanje će biti realizovano u sklopu projekta "Mediterranski bazen", a učestvovat će i predstavnici tranzicionog tima nove američke administracije, kao i visokorangirani dužnosnici State Departmenta, Ministarstva odbrane SAD-a, te reizabrani američki kongresmeni i senatori.

Organizator dvodnevnog foruma je Centar za transatlantske odnose SAIS pri Johns Hopkins univerzitetu, a koorganizatori Privredna komora SAD-a i Američko-bosanska fondacija, regionalni strateški partner Centra za transatlantske odnose SAIS-a.

Šta je dobar budžet za mlade?



U novembru je završen i četvrti modul Obuke službenika/ca za mlade koju organizuje Institut za razvoj mladih KULT. Od 7 do 11. novembra 2016. godine učesnici su boravili u Brčkom, gdje su imali priliku upoznati se sa standardizacijom pozicije službenika/ca za mlade, osnovama omladinskog rada, ljudskim pravima, te pojmovima diskriminacija i predrasude.

Tokom obuke se govorilo i o tome šta je dobar budžet za mlade, kako vezati budžete sa strategijama za mlade i njihovim provedbama, ali i o važnosti timskog rada.

U okviru ovog modula službenici/ce su posjetili i Antu Domića, gradonačelnika Brčko distrikta BiH. Polaznici obuke iz nekoliko bh. općina iskoristili su sastanak sa gradonačelnikom kako bi saznali i zašto Brčko još uvijek nema Zakon i Strategiju o mladima.

„Jedan od problema Brčko distrikta jeste i Zakon o mladima, gdje imamo različite poglede i nismo uopće došli u situaciju da se očitujemo o tom zakonu zbog izvjesnih prijepora ili primjedbi“, istakao je Anto Domić, gradonačelnik Brčko distrikta BiH.

Domaćin obuke koju pohađa 21 službenik/ca, odnosno državni službenici za rad sa mladima, bio je Omladinski centar Brčko.

Službenici/ce su dužni pohađati pet modula, a najmanje u 80% obuke uraditi i domaće zadatke poslije prva četiri modula, te uraditi završno testiranje nakon kojeg će najuspješniji dobiti i certifikat u skladu sa Pravilnikom.

Obuka službenika/ca ima cilj da se polaznici/e osposobe za samostalno obavljanje poslova službenika/ca sticanjem certifikata o znanju o politici prema mladima i radu s mladima, te da osobe koje u državnoj službi obnašaju ili će obnašati funkciju i poslove službenika/ca budu stručno osposobljene za rad s mladima, uz posjedovanje stručnih kompetencija i certifikata neophodnih za obavljanje te pozicije u organu državne službe.

Program obuke održava se u partnerstvu sa Federalnim ministarstvom kulture i sporta, po čijem se pravilniku obuka i provodi, a u suradnji sa Centrom Olof Palme.

Mladi ne smiju upadati u svakodnevne zamke



Kako kritički razmišljati? Kako slušati sagovornika? Kako kvalitetno komunicirati ideje i projekte?

Ovo su samo neka od pitanja na koje je polaznicima/cama UMID obuke odgovore ponudila dugogodišnja novinarka Aida Riđanović.

U okviru petog modula obuke „Uči, misli, djeluj!“, učesnici/ce su učili i o medijskoj pismenosti, načinima izvještavanja za javnost, organizovanju konferencije za medije, te interakciji sa medijima.

Tokom praktičnog dijela obuke mladi su imali priliku učestvovati u simulaciji održavanja konferencije za medije, vođenju intervjua, te debati na zadanu temu.

„Mladi moraju biti medijski pismeni. Trebamo ih naučiti da ne upadaju u svakodnevne zamke, naročito što su u današnjem vremenu „zatrpani“ informacijama. Trebaju znati kritički razmišljati i na osnovu toga prosuđivati i donositi odluke.“ – poručila je Aida Riđanović.

U obuci učestvuje 24 mladih iz cijele Bosne i Hercegovine, a krajem godine bit će dodijeljeni i certifikati za najuspješnije polaznike/ce obuke.

Pokrenut još jedan dijalog sa mladim ljudima u BiH

Na Jahorini je 15. i 16. novembra 2016. godine održana konferencija „Upalimo svjetla za mlade“.

Dvodnevna konferencija bila je prilika da o problemima mladih razgovaraju predstavnici lokalnih samouprava, kantonalnih i entitetskih ministarstva koja su podržala proces izrade strateških dokumenta za mlade u Bosni i Hercegovini u posljednje tri godine, te mladi kojih se ovi procesi najviše i tiču.

Učesnici konferencije razgovarali su o iskustvima u kreiranju i provedbi politika za mlade, saradnji omladinskog, nevladinog i vladinog sektora, te usklađivanju djelovanja sektora za mlade na svim nivoima vlasti. Bila je ovo prilika i da se ponovo aktueliziraju pitanja Strategije prema mladima na svim nivoima vlasti, te da se identificiraju problemi sa kojima se mladi i institucije najčešće susreću u provedbi strateških dokumenta.

Konferencija je organizovana u okviru inicijative „Jačanje struktura za osnaživanje i participaciju mladih u BiH“, u partnerstvu Omladinskog komunikativnog centra Banja Luka i Instituta za razvoj mladih KULT, koju finansiraju Evropska unija kroz EIDHR program, Ministarstvo porodice, omladine i sporta u Vladi RS, te Federalno ministarstvo kulture i sporta.



„Inicijativom Jačanje omladinskih struktura u BiH, između ostalog, jačamo krovne omladinske organizacije, kako bi samostalno i direktno mogle utjecati na poboljšanje položaja mladih u BiH. Institut za razvoj mladih KULT i Omladinski komunikativni centar iz Banje Luke (OKC) u tom procesu sarađuju sa entitetskim ministarstvima nadležnim za pitanja mladih i drugim organizacijama.“-istakla je Katarina Vučković iz Instituta za razvoj mladih KULT.

Tokom konferencije su predstavljeni rezultati aktivnosti inicijative u prethodne tri godine, ali i pokrenut još jedan dijalog sa mladim ljudima u BiH.



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitac je u novembru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Grupa sa mališanima je ovog mjeseca pravila dekoracije od prirodnih i drugih materijala kao što su grančice, lišće, kestenje, kamenje, vuna, kolaž i razne vrste dekorativnog i običnog papira. Mlađa grupa je svake srijede slušala razne dječije pjesmice namijenjene njihovom uzrastu, kako bi na taj način vježbali ritmiku i polako usvajali tekst. Budući da skoro svake sedmice dođe novi član, grupa svakog četvrtka vježba i ponavlja već naučene brojeve koristeći radne listove za bojenje i ponavlja oblike i boje na engleskom jeziku; takođe su učili o raznim vrstama životinja, koje su zatim crtali koristeći voštane boje, flomastere i drvene bojice. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U novembru je do 25 učesnika pohađalo jutarnje dnevne radionice.

Poslijepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+).



Ponedjeljkom je na rasporedu engleski jezik, komunikacija, izgovor, te razne igre koje pospješuju učenje stranog jezika u grupi. Grupa je i ovaj mjesec, pored gramatičkih zadataka, vježbala komunikaciju na engleskom jeziku, te usvajala novi vokabular na temu Halloween. Utorkom - kreativno izražavanje, pravljenje raznih dekoracija. Srijeda je dan za muziku i učenje osnova na klaviru, uključujući teoriju muzike za početnike i čitanje nota. Svakog četvrtka starija grupa je podijeljena u dvije manje i učesnici imaju mogućnost da se okušaju u društvenim igrama i timskom radu, razvijajući osjećaj za poštovanje drugog, socijalizaciju i fer igru. Petkom

su radionice njemačkog jezika kao i dan za pomaganje u izradi domaće zadaće.

Radionice se održavaju u Omladinskom centru Brčko distrikta. Koordinator radionica u novembru je bila Slađana Bašić uz asistenciju lokalnih i Weltwaerts i EVS međunarodnih volontera Alexandera Likica iz Njemačke, te Monice Reeves, Eleonore Pearson, Bena Owensa i Catherine Rolley iz Velike Britanije. Broj učesnika starije grupe je trenutno između 15 i 20 učesnika.

„Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-20:00 časova. Zbog velike zainteresovanosti i različitih nivoa poznavanja jezika i gramatike, učesnici su podijeljeni u dvije grupe, u grupu za početnike (novi A1) i napredne (A2, B1, B2). Radionice komunikacije na njemačkom jeziku su namijenjene svima koji žele naučiti osnove gramatike, ali i usavršiti već postojeće znanje i steći nova iskustva i poznanstva. U novembru su grupe na svim levelima radili na tekstovima prilagođenim njihovom znanju, te su vježbali korištenje određenog i neodređenog člana. Koordinator projekta je međunarodni volonter iz Njemačke Alexander Likic. Radionice je u novembru pohađalo 10 učesnika (dvije grupe).

„I love English“ – radionice komunikacije na engleskom jeziku sa izvornim govornicima



Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene svima koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. U novembru su učesnici radionica imali priliku razgovarati na temu „Halloween – Noć vještica“ te obogatiti vokabular i upoznati se sa različitim običajima za vrijeme održavanja Halloween-a u svijetu. Koordinator projekta je međunarodna volonterka iz Velike Britanije Monica Reeves. Radionice je u novembru pohađalo 10

učesnika.

„Freeletics“ – sportske radionice

Sportske radionice se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt i namijenjene su mladim ljudima koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Koordinator projekta je Miloš Popić.

Radionice gitare

Učesnici radionice gitare u novembru su nastavili uvježbavati etide i kompozicije Rolanda Dyensa, Carla Domeniconija, Franciska Tarrrege, Fernanda Sora, kao i duete Francisa Kleynjansa i Johna Dowlanda. Novi polaznici su se upoznavali sa osnovnim notnim vrijednostima i osnovama instrumenta.

Radionice sambe

Učesnici ove radionice u su uvježbavali dvije nove kompozicije (Hafla i Van Harte Pardon).

Halloween Party (Noć vještica)

Omladinska organizacija Svitac je i ove godine organizovala, u prostorijama Omladinskog centra, Halloween Party za djecu i mlade sa područja Brčko distrikta. Prvi dio je bio namijenjen uzrastu 4-6 godina od 11-13 časova, gdje su mališani imali priliku da učestvuju u raznim igrama, te da zajedno pogledaju crtani film „Casper“. Nakon toga su imali osvježenje, te se birao najbolje ručno rađen kostim uz nagradu.



Drugi dio je počeo u 18:00 časova za uzrast 8+. Uz pomoć međunarodnih volontera, Omladinska organizacija Svitac je organizovala zanimljiv program, pa su učesnici imali priliku učestvovati na tri stanice sa igrama tipičnim za Halloween, kao što su hvatanje jabuka u vodi, keksa na konopcu, slatkiša u brašnu, pogađanje skrivenih predmeta u dekorisanim kutijama, učestvovati u igrama 'muzičke stolice' i 'zaleđene statue'. U završnom dijelu zabave se takođe birao najbolje ručno rađeni kostim uz nagradu, a posle toga osvježenje sa tipičnim slatkišima za Halloween.

Dan borbe protiv fašizma 2016.

I ovog novembra Omladinska organizacija Svitac je obilježila Dan borbe protiv fašizma kroz tri radionice za tri starosne grupe (učesnici od 3-7 godina, 8-15 i 16+). Prva grupa učesnika (3-7 godina) je kroz metodu pričanja priče podstaknuta da učestvuje u kratkoj diskusiji na temu 'ANTIFAŠIZAM'. Druga grupa učesnika (8-15 godina) je sa međunarodnim volonterima prodiskutovala na temu fašizma, posebno o Drugom svjetskom ratu. Sa trećom grupom učesnika (16+ godina) održana je diskusija na temu „Anitfašizam u modernom društvu“. Učesnici su imali priliku da



razgovaraju o ovoj temi i o značenju pojma fašizam, karakteristikama i primjerima fašizma u našem modernom društvu. Tokom diskusije pogledali su video klip na temu „Teorija društvenog uticaja“, koji prikazuje određene psihološke obrasce ponašanja kod ljudskih bića poput želje da slijedimo i budemo dio grupe ili da slijepo pratimo autoritet.

Sedmica tolerancije

Članice mreže za borbu protiv mržnje „Promoviši pozitivno“ Brčko, čiji je član i Omladinska organizacija Svitac, su uz podršku Misije OSCE-a u Bosni u Hercegovini obilježile Međunarodni dan tolerancije kroz sedmodnevne aktivnosti pod nazivom „Sedmica tolerancije“, a koje su se odvijale u periodu od 10. – 16. novembra.

Neke od aktivnosti su bile: akcija – kafa za knjigu pod sloganom „Čitaj knjigu offline, ne mrzi online“, razgovor sa studentima Ekonomskog fakulteta u Brčkom o pojmovima tolerancije i različitostima u njihovom okruženju i domenu rada, fudbalska utakmica (ŽFK „Lokomotiva“ je poslao poruke tolerancije sa fudbalske utakmice protiv ŽFK „Modriča“ pokazujući da se i u fudbalu poštuju i cijene različitosti).

Svitac EVS volonterka, Monica Reeves, je pripremila kratki film sa kadrovima aktivnosti koje su se održale tokom ove sedmice. Film možete pogledati ovdje:

<https://www.youtube.com/watch?v=UQMnnT5kAcA&t=191s>

Za decembar se planira nastavak svih redovnih radionica Omladinske organizacije Svitac.



H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Dobož

Tel./fax: +387 53 226 886

E-mail: merhamet.doboj@cutuk.net

FB: www.facebook.com/Merhamet-Doboj

✦ Sastanak sa predstavnicom OSCE-a iz Banja Luke.



✦ Festival Koalicije " Tolerantno i pozitivno iz Doboja



✦ Festival Koalicije " Tolerantno i pozitivno iz Doboja " . Održan u dvorištu Fondacija Centar za djecu i omladinu kroz pisanje i crtanje poruka tolerancije.



✦ 16.11.2016. Obilježen međunarodni dan tolerancije.



✧ Izvršena je raspodjela humanitarne pomoći u subotu i nedjelju.



✧ Konsultativni sastanak sa CPDC o finansiranju organizacija civilnog društva iz budžeta.



✧ U Američkom kutku predstavnice Američke ambasade prezentovale raspisani javni oglas za projekte.



✧ Otvorenje izložbe radova žena sa invaliditetom koju organizuje savez paraplegičara R.S.



SAOPŠTENJA/INFORMACIJE/ DONATORI/POZIVI

Prevent Group: Program podrške mladima BiH

Prevent Group kroz svoje fondove afirmiše mlade i talentovane ambasadore Bosne i Hercegovine.

Korporativna politika Prevent grupacije obuhvata princip prema kome svaka uspješna kompanija treba da učestvuje u razvoju društva, društvene okoline i svojim radom promovira kolektivno dobro zajednice. Uzimajući u obzir sve navedeno Prevent posebnu pažnju poklanja razvoju lokalne zajednice i mladih u njoj. Afirmišemo mlade i talentovane ambasadore Bosne i Hercegovine te im pomaže na putu ka ostvarenju snova. Kroz podršku Fondaciji Hastor, Prevent stipendira preko 1393 osnovaca, srednjoškolaca i studenata ugroženih kategorija.

Kroz politiku društveno odgovornog poslovanja Prevent posebnu pažnju poklanja njegovanju odnosa s lokalnom zajednicom te izgradnji zajedničke vrijednosti kao osnove za razvoj kompletnog društva. U okviru njegovanja navedenih odnosa, Prevent grupacija je višegodišnji sponzor raznih kulturnih manifestacija, sportskih klubova i drugih aktivnosti od šireg društvenog značaja.

[Ovdje](#) preuzmite formular za donacije i sponzorstva.

Izvor: <http://www.hocu.ba/index.php/hocu.priliku/prevent-group-program-podrske-mladima-bosne-i-hercegovine/>

Oxford Univerzitet kreće sa besplarnim online kursevima

Oxford, najbolje rangirani univerzitet na svijetu uskoro će početi pružati besplatne otvorene online kurseve i na taj način se pridružiti prestižnim institucijama kao što su Berkli, Harvard i MIT.

Od februara 2017. Oxford univerzitet biće partner sa neprofitnom platformom za online učenje EDX i ponudiće online svoj kurs pod nazivom "From Poverty to Prosperity: Understanding Economic Development."

Glavni predavač na kursu je profesor ekonomije i politike sa Oxforda, Sir Paul Collier, a kurs će preispitati "vitalnu ulogu koju vlade imaju u podršci ekonomskom razvoju."

"Misija naše škole je da poboljša rad vlada širom svijeta kroz istraživanje i obrazovanje, a za to je potrebno bolje obrazovanje javnih funkcionera, nastavnika, preduzetnika, novinara i građana," kaže je Ngaire Woods, profesor i dekan na Oxfordu.

Upis je otvoren [putem platforme EDX](#), a kurs će trajati šest nedjelja. Očekuje se da će biti potrebno oko dva do tri sata nedjeljno da biste ga završili. Materijali će biti dostupni i kada se kurs završi.



Možda je i Oxford bio inspirisan aktuelnim pripremama za Black Friday tokom kojih je [ponuđeno hiljade online kurseva za samo 10 dolara](#).

Izvor: <http://www.hocu.ba/index.php/hocu.priliku/oxford-univerzitet-krece-sa-besplatnim-online-kursevima/>

Grantovi za Grass Roots projekte (GAGP)

Vlada Japana je prvi put 1989. godine pokrenula program pomoći pod nazivom "Grass Roots Projects (GAGP)", temeljni projekti, kao dodatak Generalnom programu pomoći vlade Japana. Od 1996. godine preko 180 projekata u ukupnom iznosu od cca. 10 miliona EUR / 19 miliona KM je implementirano u Bosni i Hercegovini u okviru GAGP programa.

Iako obje sheme imaju za cilj pružanje pomoći zemljama u razvoju u namjeri da im pomogne da zadovolje osnovne ljudske potrebe i riješe socijalno-ekonomske izazove, GAGP je fokusiran na podršku lokalnim zajednicama, odnosno direktno stanovništvu.

U okviru GAGP grantovi se dodjeljuju javnim institucijama (općinama i općinskim javnim poduzećima), osnovnim školama, domovima zdravlja ili organizacijama civilnog društva koje sprovode relativno male projekte.

2. Prioriteti

Unutar programa GAGP Japan podržava širok spektar projekata koji se baziraju na osnovne ljudske potrebe, kao i koji se baziraju na sigurnost. U Bosni i Hercegovini većina projekata koji se implementiraju unutar GAGP spada u sljedeće kategorije:

- Pomoć aktivnostima za deminiranje
- Javno zdravstvo
- Obrazovanje
- Socijalna zaštita
- Ruralni razvoj

3. Aplikanti

Prihvatljivi aplikanti su: javne institucije (općine i općinska javna poduzeća), osnovne škole, domovi zdravlja i lokalne i međunarodne organizacije civilnog društva

Neprihvatljivi aplikanti su: fizička lica, organizacije centralne vlasti (prihvatljivi samo u izuzetnim slučajevima) obdaništa, istraživački instituti, institucije višeg obrazovanja, bolnice, političke organizacije, vjerske ustanove.

4. Grant

GAGP finansira izgradnju i/ili nabavku opreme i/ili materijala. Svi predloženi materijali, oprema i usluge, treba da budu nabavljeni od domaćih dobavljača.

Grantovi isključivo pokrivaju troškove nabavke robe/usluga bez PDV-a.

Administrativni i operativni troškovi nisu prihvatljivi.

Maksimalan iznos raspoloživih sredstava po projektu je 10 miliona JPY (približno 80,000.00 EUR-a ili 156,000.00 KM), osim za projekte pomoći aktivnostima za deminiranje gdje maksimalan iznos granta može biti veći od 10 miliona JPY.

GAGP neće pružiti finansijsku potporu za projekte kao što su kulturno sportski događaji, aktivnosti vezane za biznis, niti za aktivnosti koje se odnose na religiju.

5. Podnošenje aplikacije i procedure koje treba da se slijede

1. Dostava aplikacije

Aplikacija se ispunjava na lokalnom ili engleskom jeziku, te dostavlja putem pošte na adresu ambasade: Bistrik 9, 71 0000 Sarajevo. Aplikacija se može dostaviti tokom cijele godine.

2. Provjera i odobravanje

Po primitku aplikacije, Ambasada Japana provjerava cilj, troškove i očekivani socijalno-ekonomski pozitivni uticaj projekta. Za sve projekte koji su uzeti u razmatranje Ambasada će napraviti pred-selekciju onih projekata koji odgovaraju ciljevima GAGP i osoblje Ambasade će upriličiti posjetu potencijalnom projektu području. Ambasada će ih predložiti Ministarstvu inostranih poslova Japana koje je krajnja institucija koja odobrava projekte.

3. Grant Contract (G/C) – Grant ugovor

Po konačnom odobrenju, ambasada Japana i organizacija koja prima pomoć će zaključiti ugovor (G/C) koji uključuje naziv, cilj i sadržaj projekta, naziv organizacije primaoca pomoći, visinu iznosa koji će biti obezbjeđen putem GAGP i stavke o ispravnom utrošku sredstava.

4. Trošenje sredstava

Nakon toga, korisnik granta će zaključiti ugovor o nabavci (P/C) za robu i/ili usluge sa dobavljačem. Ambasada će pregledati P/C (ili dokaz/predračun) da bi ustanovila da li je ista odgovarajuća.

U načelu trajanje projekta (vrijeme neophodno za nabavku robe i /ili usluga) bi trebalo biti do jedne godine dana.

5. Izvještavanje

Ambasada će tražiti od primaoca GAGP granta da pripremi i dostavi izvještaj o stanju projekta i to dva puta ukoliko se radi o standardnom projektu, a ukoliko je obim projekta veći broj traženih izvještaja će biti veći. Osoblje Ambasade može posjetiti mjesto projekta da bi se uvjerilo da se sredstva koriste za namjenu za koju su odobrena.

Više informacija: <http://www.bosnia.emb-japan.go.jp/BHS/EconomicGAGP.html>

Robert Bosch Stiftung: Finansiranje za projekte na područjima izgradnje mira i transformacije sukoba.

Broj sukoba unutar zemalja, kao i sukoba među nacijama je i dalje u porastu u posljednjih nekoliko godina. Ovaj trend prati veći broj lokalnih, regionalnih i međunarodnih inicijativa transformacije sukoba. Stoga postoji velika potreba za ciljanom i pravovremenom podrškom.

Naš cilj je podržati projekte koji služe facilitiranju transformacije sukoba u sukobu (i prošlih sukoba) društava u različitim regijama.

Kao rezultat toga su podržani projekti koji se fokusiraju na suočavanje sa prošlosti, uključujući pitanja tranzicijske pravde, posredovanja, ljudska i manjinska prava, jedinstvenu ulogu digitalnih tehnologija u sukobima (i postkonfliktnim društvima), načine izvještavanja o sukobima, i ulogu religije u sukobima.

Posebno smo voljni podržati projekte koji omogućuju prijenos dobre prakse iz jedne regije ili ciljanog u područja u drugo.

Tokom čitave godine se primaju prijave za finansiranje projekata do cca 25.000 eura.

Link za više informacija:

<http://www.bosch-stiftung.de/content/language2/html/61514.asp>



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

**Omladinski resursni centar
Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orcuzla@bih.net.ba
hcatuzla@bih.net.ba**

*Mjesečni bilten uređuje
Omladinski resursni centar -
ORC Tuzla*

WEB stranica Mreže:

www.omladina-bih.net

Mejling lista Mreže:

posta@omladina-bih.net

Webmaster:

emir.delalic@gmail.com